



4 甲 5  
3895  
4 5





伊  
3895  
4

門 4 8  
號 3895  
卷 4

契丹國志卷之十九

列傳

馬保忠

馬保忠營州人也疏眉目豐下謹重寡慾斤斤自修

士。一無人賢其行自力讀書不謁州縣節用以給

親里大穰則振其餘於鄉黨太平年間授洗馬改著

作郎殿中丞興宗朝為樞密使尙父守太師兼政事

令封燕國公時朝政不綱溺志浮屠僧至有正拜三

公三師者官爵非人妄有除授保忠嘗從容進諫帝

至怫然怒之詳見帝紀又嘗上言強天下者儒道弱



契丹國志 卷之十九



天下者吏道今之授官大率吏而不儒崇儒道則鄉黨之行修修德行則冠冕之緒崇自今其有非聖帝明王孔孟聖賢之教者望下明詔痛禁絕之其篤意風教如此後數年保忠卒賜謚曰剛簡

論曰官不當則人多覬覦源不清則下皆奔競契丹自重熙之時私謁肆行除授無法膜拜之徒亦授以公孤之官其濫極矣保忠雖空臆無諱然言諄聽藐末如之何哉

張琳

張琳密州人也爲人忠義慷慨有大志在道宗朝爲

秘書中允天祚立兩爲戶部使負東京人望女真日熾高永昌繼叛於渤海時天慶六年也永昌叛遼東五十餘州盡沒獨瀋州未下琳痛念鄉枌欲自討之契丹屢敗精兵銳卒十無一存琳討永昌搏手無策始招所謂轉戶軍蓋遼東渤海乃夙所讐若其轉戶則使從良庶幾捐軀奮命命下得兵三萬餘琳自顯州進兵渤海止備遼河三义口琳遣羸卒數千陽爲來攻間道以精騎渡河直趨瀋州渤海始覺經三十餘戰渤海乃走保東京其後女真援至師自驚恐望風而潰失亡不可勝計琳遁入遼州謫授遼興軍節



彭丹國志 卷之十九 二  
庶使乃平州也其後授燕京副留守與燕王淳同守  
燕淳僭位改元命琳守太師十日一朝平章軍國大  
事實疎之也琳鬱鬱而卒

論曰張琳丁時孔難則痛心於鄉國之危遭家  
不造則阨腕於燕王之立女真之勢湯湯方割  
揚灰注海安得不淪借其愔愔問鼎之間曾無  
死清君側之志此姦人得以誑之而大節不無  
少貶歟

### 蕭奉先

蕭奉先天祚后族也嗣先保先皆其弟奉先在道宗

朝爲內侍供奉又爲承旨歷吏部尙書緣恩宮掖專  
尙諂諛朋結中人互爲黨與至天祚朝毬獵聲色日  
蠱其心防微不早女真始亂奉先是爲政事令同平  
章事又兼樞密使方混同江諸蕃大會之時天祚已  
疑阿骨打密謂奉先曰阿骨打意氣雄豪顧視不常  
當以事誅之不然恐貽後患奉先曰阿骨打小人何  
知殺之傷向化心設有異志蕞爾小國何能爲天祚  
乃止天慶四年阿骨打始叛屠寧江州次年阿骨打  
又至弟嗣先以殿前都點檢充東北路招討使蕭撻  
勃也副之未陣而潰旣而出河店之戰嗣先又敗詣



關待罪但免官而已由此士無鬪志望風奔潰保先亦奉先弟也爲渤海留守少師政令嚴酷亦以女真之亂被殺渤海始亂天慶九年女真攻陷上京發掘陵寢取其金銀珠玉奉先皆抑而不奏天祚問及陵寢事奉先對以初雖侵犯元宮不敢毀壞陵寢其蒙蔽欺罔類皆如此又誣告耶律余覲欲立晉王余覲叛奉先曰余覲宗枝非欲亡遼者不過求立晉王耳天祚惑之賜晉王死聞者揮涕衆心益離奉先柄國垂二十年以至國亡天祚奔夾山謂奉先曰誤我至此皆汝之罪宜亟去不然恐汝及禍并累我行未十

里左右執而殺之

李儼

李儼本漢地人天祚嬖臣也少而狡桀倜儻不羣軒然夷倨才濟其姦與蕭奉先雅相厚善初爲內侍省給事累遷至中書供奉積官至南面宰相封漆水郡王儼資稍至性巧。本多無至字善諛佞人在天祚朝秉國樞柄凡十五年女真連年之亂儼與奉先蒙蔽爲欺以至於亡天祚不悟也儼嘗與知樞密院事牛溫有隙各進所親厚朋黨紛然恃奉先爲內主溫不能勝及儼死奉先又薦其姪處溫爲相竟至亡國惜也儼



不逮街之戮云

耶律余覲

耶律余覲一名余覲一作都姑國主族人其妻天祚文  
 妃之妹也文妃生晉王最賢蕭奉先忌之誣告余覲  
 余覲奔歸女真女真以為西軍大監軍久不遷常快  
 快有異志其軍下有合董也失其金牌女真疑其與  
 林牙暗合遂質其妻子余覲有叛心明年九月約燕  
 軍統軍反統軍之兵皆契丹人余覲謀誅西軍之在  
 雲中者盡約雲中河東河北燕京郡守之契丹漢兒  
 令誅女真之在官在軍者天德知軍偽許遣其妻來

告時悟室為西監軍自雲中來燕微聞其事而未信  
 與通事漢兒那也回行數百里那也見二騎馳甚遽  
 問之曰曾見監軍否以不識對問為誰曰余覲下人  
 那也追及悟室曰適爾契丹云余覲下人既在西京  
 何故不識監軍北人稱雲中為西京恐有姦謀遂回馬追獲之  
 搜其靴中得余覲書曰事已泄宜便下手復馳告悟  
 室即回燕統軍來謁縛而誅之又二日至雲中余覲  
 微覺父子以遊獵為名遁入夏國夏人問有兵幾何  
 云親兵三二百遂不納投達韃韃先受悟室之命  
 其首領詐出迎具食帳中潛以兵圍之達韃善射無



衣甲余覩出敵不勝父子皆死凡預謀者悉誅契丹之黠漢兒之有聲者皆不免

大實

大實林牙林牙者乃其官名猶中國翰林學士大實則小名也北地間無姓者大實既降女真與大酋粘罕為雙陸戲爭道相忿罕心欲殺之而口不言大實懼及既歸帳即棄其妻携五子宵遁詰旦粘罕怪其日高不來使詔之其妻曰昨夕以酒忤大人大音畏罪而竄詢其所之不以告粘罕大怒以配部落之最賤者妻不肯屈強之極口嫚罵遂射殺之大實深入

沙子立天祚之子梁王為帝而相之女真遣故遼余

覩帥兵經畧屯田于合董城城去上京三千里大實游騎數

十出入軍前余覩遣使打話遂退沙子者蓋不毛之

地皆平沙廣漠風起揚塵至不能辨色或平地頃刻

高數丈絕無水泉人多渴死大實之走凡三晝夜始

得度故女真不敢窮追遼御馬數十萬牧於磧外女

真以絕遠未之取皆為大實所得今梁王大實皆亡

餘黨猶居其地

論曰亡契丹者蕭奉先李儼亡之也非女真也

夫國之盛衰視其柄國之臣何如耳天祚荒淫



委政后族惑於奉先儼之欺蔽阿骨打不當信而信之晉王不當害而害之夾山之禍有自來矣舉二百餘年之基業一朝而覆之姦諛之誤國其明效大驗至此極也悲夫

番將除授職名

高唐英

彰德節度使

崔廷勳

大同節度使

高模翰

河陽節度使

潘聿撚

元欲妹婿

橫海節度使

留珪

元欲弟

義成節度使

劉晞

常為樞密平章事

西京留守

耿崇美

昭義節度使

蕭海真

元欲妻弟

幽州節度使

楊耨姑

契丹通事

忻州節度使

楊袞

武定節度使

漢官除授職名

韓紹芳

同平章事

竇振

三司使

韓紹昇

宣徽南院事

耿元吉

戶部使



劉元

兵部尚書知上京留

劉四端

禮部尚書叅知政事簽書樞密院

事

張克忠

守司徒兼侍中知樞密院事

韓紹雍

行官都部署兼侍中

契丹國卷之十九終

契丹國志卷之二十

晉表

晉出帝降表

孫男臣重貴言頃者唐運告終中原失馭數窮否極  
 天缺地傾先人有田一成有衆一族兵連禍結力屈  
 勢孤翁皇帝救患摧剛興利除害躬擐甲冑深入寇  
 場犯露蒙霜度鴈門之險馳風擊電行中冀之誅黃  
 鉞一麾天下大定勢凌宇宙義感神明功成不居遂  
 興晉祚則翁皇帝有大造於石氏也旋屬天降鞠凶  
 先君卽世臣遵承遺旨纂紹前基諒闇之初荒迷失



次凡有軍國重事皆委將相大臣至於擅繼宗祧既非稟命輕發文字輒敢抗尊自啓釁端果貽赫怒禍至神威運盡天亡十萬師徒望風束手億兆黎庶延頸歸心臣負義包羞貪生忍耻自貽顛覆作墜上累祖宗偷度朝昏苟存視息翁皇帝若惠顧疇昔稍霽雷霆未賜靈誅不絕先祀則百口荷更生之德一門銜無報之恩雖所願焉非敢望也臣與太后妻馮氏於郊野面縛俟命

皇太后降表

晉室皇太后新婦李氏妾言張彥澤傳任兒等至伏

蒙皇帝阿翁降書安撫者妾伏念先皇帝頃在并汾適逢屯難危同累卵急若倒懸智勇俱窮朝夕不保皇帝阿翁發自冀北親抵河東跋履山川踰越險阻立平巨孽遂定中原救石氏之覆亡立晉朝之社稷不幸先帝厭代祀子承祧不能繼好息民而反虧恩辜義兵戈屢動駟馬難追戚實自貽咎將誰執今穹昊震怒中外攜離上將牽羊六師解甲妾舉宗負釁視景偷生惶惑之中撫問斯至明宣恩旨曲示含容慰諭丁寧神爽飛越豈謂已垂之命忽蒙更生之恩省罪責躬九死未報今遣孫男延煦延寶奉表請罪



契丹國志 卷之二十一  
陳謝以聞

澶淵誓書

宋真宗誓書

維景德元年歲次甲辰十二月庚辰朔七日丙戌大  
宋皇帝謹致誓書于契丹皇帝闕下共遵誠信慶守  
歡盟以風土之宜助軍旅之費每歲以絹二十萬疋  
銀一十萬兩更不差使臣專往北朝只令三司差人  
搬送至雄州交割沿邊州軍各守疆界兩地人戶不  
得交侵或有盜賊逋逃彼此無令停匿至於隴畝稼  
穡南北勿縱搔擾所有兩朝城池並可依舊存守洵

濠完葺一切如常即不得創築城隍開掘河道誓書

之外各無所求必務協同庶存悠久自此保安黎庶

○又謹守封陲質于天地神祇告于宗廟社稷子孫

作獻共守傳之無窮有渝此盟不克享國昭昭天鑒當共

殛之遠具披陳專俟報復不宣

契丹聖宗誓書

維統和二十二年歲次甲辰十二月庚辰朔十二日

辛卯大契丹皇帝謹致書于大宋皇帝闕下共議戢

兵復論通好兼承惠顧特示誓書以風土之宜助軍

旅之費每歲以絹二十萬疋銀一十萬兩更不差使



契丹國志 卷之二十一  
臣專往北朝只令三司差人搬送至雄州交割沿邊  
州軍各守疆界兩地人戶不得交侵或有盜賊遁逃  
彼此無令停匿至於壠畝稼穡南北勿縱搔擾所有  
兩朝城池並可依舊存守洵濠完葺一切如常卽不  
得創築城隍開掘河道誓書之外各無所求必務協  
同庶存悠久自此保安黎庶謹守封陲質于天地神  
祇告于宗廟社稷子孫共守傳之無窮有渝此盟不  
克享國昭昭天鑒當其殛之某雖不才敢遵此約謹  
告于天地誓之子孫苟渝此盟神明是殛專具諮述  
不宣

關南誓書

契丹興宗致書

維契丹重熙十年歲次壬午貳月弟大契丹皇帝謹  
致書于兄大宋皇帝闕下粵自世修歡契時遣使輶  
封圻殊兩國之名方冊紀一家之美蓋欲洽於綿遠  
固將有以披陳切緣馬橋關南是石晉所割迄今柴  
氏以代郭周興一時之狂謀掠十縣之故壤人神共  
怒廟社不延至於貴國祖先肇創基業尋與敵境繼  
爲善鄰暨乎太宗紹登寶位於有征之地才定并汾  
以無名之師直抵燕薊羽石精銳禦而獲退遂致移



鎮國強兵富南北王府并內外諸軍彌年有戍境之勞繼日備渝盟之事始終反覆前後諳詳嘗切■審專命將臣平河右炎涼屢易勝負未聞兼李元昊於北朝久已稱藩○又累會尙主克保君臣之道實爲甥舅之親設罪合致討亦宜垂報○一作一邇者郭稹侍至杜防人回雖具音題而但虞詐謀已舉殘民之伐會無忌器之嫌營築長堤填塞隘路開决塘水添置邊軍旣潛稔於猜嫌慮難敦於信睦倘或思久好其遣疑懷曷若以晉陽舊附之區關南元割之縣俱歸當國用康黎人如此則益深兄弟之懷長守子孫之

計緬惟英晤深達悃悰適居春陽善綏冲裕

宋朝回契丹書

維慶歷二年歲次壬午四月大宋皇帝謹致書于契丹皇帝闕下昔我烈考章聖皇帝保有基圖惠養黎庶與契丹昭聖皇帝弭兵講好通聘著盟肆余慕承共遵謨訓邊民按堵垂四十年茲者專致使臣特貽緘問且以瓦橋舊地晉陽古封援石氏之割城述周朝之復境係于異代安及本朝粵自景德之初始敦鄰堡之信凡諸細故咸不寘懷況太宗皇帝親駕并郊匪圖燕壤當時貴國亟發援兵旣交石嶺之鋒遂



舉薊門之役義非反覆理有因緣元昊賜姓稱藩稟  
朔受祿忽謀狂僭倣擾邊陲曷議討除已嘗聞達杜  
防郭積傳導備詳及此西征豈云無報聘輶旁午屢  
聞嫉惡之談慶問交馳未諭聯親之故忽窺異論良  
用惘然謂將軫於在原反致譏於忌器復云營築堤  
埭開決陂塘昨緣霖潦之餘失爲愆溢之患旣非疎  
導當稍善防豈蘊猜嫌以虧信睦至於備塞隘路閱  
習兵夫蓋邊臣謹職之常乃鄉兵克籍之舊在於貴  
境寧撤戍兵一皆示以坦夷兩何形於疑阻顧惟歡  
契方保悠長遽興請地之言殊匪載書之約信辭至

悉靈鑒孔昭兩地不得相侵緣邊各守疆界二書之  
外一無所求期在久要弗違先志諒惟聰達應切感  
思甫屬清和妙臻散穀

契丹回宋誓書

維重熙十一年歲次癸未八月壬申朔二十九日庚  
子弟契丹皇帝謹致書于兄大宋皇帝闕下來書云  
謹按景德元年十二月七日章聖皇帝與昭聖皇帝  
誓曰共遵誠信虔守歡盟以風土之儀物備軍旅之  
費用每歲以絹二十萬疋銀一十萬兩更不差使臣  
專往北朝只令三司差人搬送至雄州交割沿邊州



軍各守疆界兩地人戶不得交侵或有盜賊逃遁彼  
此勿令停匿至於墾畝稼穡南北勿縱搔擾所有兩  
朝城池并各依舊存守修壕葺塞一切如常卽不得  
創築城隍開決河道誓書之外一無所求各務協心  
庶同悠久自此保安黎庶謹守封疆質于天地神祇  
告于宗廟社稷子孫共守傳之無窮有渝此盟不克  
享祀昭昭天鑒共當殛之昭聖皇帝復荅云孤雖不  
才敢遵此約謹當告于天地誓之子孫神明具知嗚  
呼此盟可改後嗣何述切以兩朝修睦三紀于此邊  
鄙用寧干戈載偃追懷先約炳若日月今綿襁已深

敦好如故關南縣邑本朝傳守懼難依從別納金幣  
之儀用代賦稅之物每年增絹一十萬疋銀一十萬  
兩搬至雄州白溝交割兩界澹淀已前開畝者並依  
舊例自今已後不得添展其堤堰水口逐時決洩壅  
塞量差兵夫取便修疊疏導非時霖潦別至大段漲  
溢並不在關報之限南朝河北沿邊北朝自古北口  
以南沿邊軍民除見管數目依嘗教閱無故不得大  
段添進兵馬如有事故添屯卽令逐州軍移牒關報  
兩界所屬之處其自來乘例更替及本路移易不在  
關報之限兩界逃走作過諸色人並以先朝誓書外



更不得以目前停留容縱恭惟二聖威靈在天願茲  
慕承各當遵奉共循大體無介小嫌且夫守約爲信  
善鄰爲義二者缺一罔以守國皇天厚地實聞此盟  
文藏宗廟副在有司餘並依景德統和兩朝誓書顧  
惟不德以敦大信苟有食言必如前誓

議割地界書

契丹道宗遣泛使林牙興復軍節度使蕭禧如宋  
言代北對境有割地請遣使分畫其後宋割弃地  
五百里以分水嶺爲界時宋神宗熙寧七年也

大遼求地界書

維咸雍十年歲次甲寅三月大遼皇帝謹致書于大  
宋皇帝闕下切以累朝而下講好以來互守成規務  
敦夙契雖境分二國克保於難知而義若一家共思  
於悠永事如聞於違越理須至於敷陳其蔚應朔三  
州土田一帶疆土祇自早歲曾遣使人止於舊封俾  
安鋪舍庶南北永標於定限往來悉絕於姦徒洎覽  
舉申輒有侵擾於全屬當朝地分或營修伐壘或存  
止居舍皆是守邊之冗員不顧睦鄰之大體妄圖功  
賞深越封陞今屬省巡遂令按視備究端實諒難寢  
停至縷細之緣由分白之事理已具聞達盡令折移



既未見從故宜伸報據侵入當界事理所起鋪堠之處各差官員同共檢照又作點早令毀撤却於久來元定地界再安置外其餘邊境更有生創事端委差去使臣到日一就理會如此則豈惟疆場之內不見侵踰兼于信誓之間且無違爽茲實穩便顯俟淮依

宋朝回書

維熙寧七歲次甲寅月大宋皇帝謹致書于大遼皇帝闕下辱迂使指來貺函封歷陳二國之和有若一家之義固知鄰保深執信符獨論邊鄙之臣嘗越封陞之守欲令移徙以復舊常切惟兩朝撫有萬宇

豈重尺土之利而輕累世之歡況經界之間勢形可指方州之內圖藉俱存當遣官司各加覆視或事由夙昔固難徇從或誠侵踰何吝改正而又每戒疆吏令遵誓言所諭創生之事端亦皆境候之細故已令還使具達本因細料英聽洞垂照悉



契丹國志卷之二十一

南北朝饋獻禮物

契丹賀宋朝生日禮物

宋朝皇帝生日北朝所獻刻絲花羅御樣透背御衣  
七襲或五襲七件紫青貂鼠翻披或銀鼠鴉頂鴨頭  
納子塗金銀裝鑲金龍水晶帶銀匣副之錦綠帛皴  
皮鞞金玦京皂白熟皮鞞鞣細錦透背清平內製御  
樣合線縷機綾共三百疋塗金銀龍鳳鞍勒紅羅匣  
金線繡方鞞二具白楮皮黑銀鞍勒瓊鞞二具綠褐  
楮皮鞍勒海豹皮鞞二具白楮皮裏筋鞭一條紅羅



金銀線繡雲龍紅錦器仗一副黃樺皮纏楮皮弓一  
紅錦袋皂雕翎獬角髀頭箭十法漬法麵麵麴酒二  
十壺蜜山果十束檯椀密漬山果十束檯皮列山梨  
柿四束檯榛栗松子郁李黑郁李子麵棗楞梨棠梨  
二十箱麵杭麩梨炒十椀蕪荳白鹽十椀青鹽十椀  
牛羊野豬魚鹿腊二十箱御馬六匹散馬二百匹  
正旦御衣三襲鞍勒馬二匹散馬一百匹國母又致  
御衣綴珠貂裘鈿錦刻絲透背合線御綾羅綺紗縠  
御樣果實雜炒腊肉凡百品水晶鞍勒新羅酒青鹽  
國主或致戎器賓鐵刀鷲禽日海東青之類承天節

又遣庖人持本國異味前一日就禁中造食以進御  
云

宋朝賀契丹生辰禮物

契丹帝生日南宋遺金酒食茶器三十七件衣五襲  
金玉帶二條烏皮白二量紅牙笙笛觥栗拍板鞍勒  
馬二匹纓複鞭副之金花銀器三十件銀器二十件  
錦綺透背雜色羅紗綾縠絹二千疋雜絲二千疋法  
酒三十壺的乳茶十斤岳麓茶五斤鹽蜜果三十罐  
乾果三十籠其國母生日約此數焉 正旦則遺以  
金花銀器各三十件雜色羅綾紗縠絹二千疋雜絲



二千疋

宋朝勞契丹人使物件

契丹每歲國史入南宋境宋遣常叅官內職各一人假少卿監諸司使以上接伴內諸司供帳分爲三番內臣主之至白溝驛賜設至貝州賜茶藥各一銀合至大名府又賜及畿境遣開封判官勞之又命臺省官諸司使館伴迂於班荆館至都亭驛各賜金花銀器錦衾褥朝見日賜大使金塗銀冠帛羅氈冠衣八件金鞞鞞帶烏皮鞋銀器二百兩絲帛二百匹副使皂紗折上巾衣七件金帶象笏烏皮鞋銀器一百兩

絲帛二百匹鞍勒馬各一匹其從人上節十八人各練鵲錦襖及衣四件銀器二十兩絲帛三十匹中節二十人各寶照錦襖及衣三件銀器十兩絲帛二十匹下節八十五人各紫綺襖衣四件銀器十兩絲帛二十匹並加金塗銀帶上節中節又加絲鞵就館賜生餼大使稅粟各十石麵二十石羊五十法酒糯米酒各十壺副使稅粟各七石麵十五石羊三十法酒糯米酒各十壺 承天節各別賜衣一襲 遇立春各賜金塗銀縷幡勝春盤又命節帥就玉津園伴射賜來使銀飾箭筒弓一箭二十其中的又賜窄袍衣



五件金束帶鞍勒馬 在館遇節序則遣臣賜設  
辭日長春殿賜酒五行賜大使盤裘暈錦窄袍及衣  
六件銀器二百兩綵帛一百匹副使紫花羅窄袍及  
衣六件銀器一百兩綵帛一百匹並加金束帶雜色  
羅錦綾絹百匹從人各加紫綾花絕錦袍及銀器綵  
帛 將發又賜銀瓶合盆紗羅等又令近臣餞于班  
荆館開封府推官餞于郊外接伴大使副使復爲送  
伴緣路累賜設

外國貢進禮物

新羅國貢進物件

金器二百兩 金抱肚一條五十兩 金紗羅五十  
兩 金鞍轡馬一匹五十兩 紫花綿紬一百疋  
白綿紬五百疋 細布一千疋 粗布五千疋 銅  
器一千斤 法清酒醋共二百瓶 腦元一作光茶十斤  
藤造器物五十事 成形人參不定數 無灰木  
刀擺十箇 細紙墨不定數目  
本國不論年歲惟以八節貢獻人使各帶正官惟稱  
陪臣

橫進物件

粳米五百石 糯米五百石 織成五彩御衣金不



契丹國志 卷之二十一  
定數

契丹每次回賜物件

犀玉腰帶二條 細衣二襲 金塗鞍轡馬二匹  
素鞍轡馬五匹 散馬一十匹 弓箭器仗一副  
細錦綺羅綾二百匹 衣著絹一千匹 羊二百口  
酒果子不定數

並命刺史已上官充使一行六十人直送入本國

契丹賜奉使物件

金塗銀帶二條 衣二襲 錦綺三十疋 色絹一  
百疋 鞍轡馬二匹 散馬五匹 弓箭器一副

酒果不定數

上節從人 白銀帶一條 衣一襲 絹二十疋  
馬一匹

下節從人 衣一襲 絹十疋 紫綾大衫一領

西夏國貢進物件

細馬二十匹 麁馬二百匹 駝一百頭 錦衣三  
百疋 織成錦被褥五合 從容耐石并鹽各一千  
斤 沙狐皮一千張 兔鶻五隻 犬子十隻  
本國不論年歲惟以八節貢獻

契丹回賜除羊外餘竝與新羅國同惟玉帶



改為金帶勞賜人使亦同

諸小國貢進物件

高昌國 龜茲國 于闐國 大食國

小食國 甘州 沙州 涼州

已上諸國三年一次遣使約四百餘人至契丹貢獻

玉珠 犀 乳香 琥珀 礪砂 瑪瑙器 賓

鐵兵器 斜合黑皮 褐黑絲 門得絲 怕里阿

褐里絲。已上皆細毛織成以二丈為疋

契丹回賜至少亦不下四十萬貫

契丹國志卷之二十一終

契丹國志卷之二十二

州縣載記

契丹自太祖太宗初興戰爭四十餘年吞併諸番割

據燕雲南北開疆五千里東西四千里共二百餘州

建五京五處

燕京三司 西京轉運 中京度支 上京鹽鐵

東京戶部錢鐵司

大藩府六處

南大王府 北大王府 乙室王府 黃龍府

興中府 奚王府



錢帛司三處

平春路 遼西路 平州

節鎮三十三處

奉聖州 雲內州 長春府 龍化州 海北州

貴德府 蔚州 應州 朔州 綿州

乾州 顯州 震州 遼州 咸州

瀋州 薊州 復州 慶州 祖州

川州 成州 萊州 懿州 宜州

坤州 平州 辰州 興州 同州

信州 饒州 建州

建觀察防禦團練使八處

武安州 永州 秦州 高州 利州

寧江州 歸州 廣州

刺史州七十餘處

德州 黔州 潭州 惠州 榆州

營州 灤州 勝州 溫州 巖州

歸化州 州 松州 思州 山州

武德州 通州 韓州 烏州 靖一作清州

寧邊州 賓州 祥州 新州 衛州

降聖州 燕州 海州 涿州 銀州



|     |     |    |    |                        |
|-----|-----|----|----|------------------------|
| 遼西州 | 鐵州  | 開州 | 保州 | 薊州                     |
| 北安州 | 岳州  | 嘉州 | 集州 | 連州                     |
| 濱州  | 宏東州 | 肅州 | 威州 | 古 <small>一作石</small> 州 |
| 仙澗州 | 文州  | 蘭州 | 慎州 | 拱州                     |
| 安州  | 渝州  | 河州 | 雙州 | 宋州                     |
| 涿州  | 易州  | 檀州 | 順州 | 薊州                     |
| 雍州  | 東州  | 海州 | 勝州 | 景州                     |
| 許州  | 招州  | 康州 | 錦州 | 來州                     |
| 儒州  | 雲州  | 平州 |    |                        |

遼東邊遠不記州十餘縣外見記五處

|            |     |    |    |    |
|------------|-----|----|----|----|
| 金肅         | 河清  | 曷童 | 五花 | 振武 |
| 諸番臣投下州二十三處 |     |    |    |    |
| 徽州         | 濠州  | 驩州 | 衛州 | 荊州 |
| 問州         | 隨州  | 和州 | 澄州 | 全州 |
| 義州         | 遂昌州 | 豫州 | 員州 | 福州 |
| 榮州         | 唐州  | 粟州 | 黑州 | 河州 |
| 茂州         | 麓州  | 宗州 |    |    |
| 控制諸國       |     |    |    |    |

沙漠府控制沙漠之北

置西路都招討府與隗部族衛驢駒河統軍司創



撻嶺衙鎮撫達勒蒙骨廸烈諸軍

雲中路控制夏國

置西南面都招討府西京兵馬都部署司金肅河

清軍五花城南北大王府乙室王府山金司

燕山路備禦南宋

置燕京都總管府節制馬步軍控鶴指揮使都統

軍司牛欄監軍寨石門詳穩司南北皮室司猛拽

刺司並隸總管府

中上京路控制奚境

置諸軍都虞候司奚王府大詳穩司大國舅司大

常袞司五院司六院司

○或無六院司字

沓溫司

○溫一作濕可

二字

遼東路控扼高麗

署東京兵馬都部署司契丹奚漢渤海四軍都指

揮使保州統軍司陽河詳穩司金吾營窠杓同

長春路鎮撫女真室韋

置黃龍府兵馬都部署咸州兵馬詳穩司東北路

都統軍司

論曰契丹之興其盛如此其亡也忽焉惜哉

四至鄰國地里遠近



契丹國志 卷之二十二  
東南至新羅國西以鴨綠江東八里黃土嶺爲界至  
保州一十一里

次東南至五節度熱女真部族共一萬餘戶皆雜處  
山林尤精弋獵有屋居舍門皆於山牆下闕之耕  
鑿與渤海人同無出租稅或遇北至征伐各量戶  
下差充兵馬兵回各逐便歸於本處所產人參白  
附子南星茯苓松子猪苓白布等物並係契丹樞  
密院所管差契丹或渤海人充節度管押其地南  
北七百餘里東西四百餘里西北至東京五百餘  
里

又次東南至熱女真國不屬契丹所管其地東西八  
百餘里南北一千餘里居民皆雜處山林耕養屋  
宇與熱女真五節度同然無君長首領統押精於  
騎射今古以來無有盜賊詞訟之事任意遷徙多  
者百家少者兩三家而已不與契丹爭戰或居民  
等自意相率賣以金帛布黃臘天南星人參白附  
子松子密等諸物入貢北番或只於邊上買賣訖  
却歸本國契丹國商賈人等就入其國買賣亦無  
所碍契丹亦不以爲防備西至東京二百餘里  
東北至生女真國西南至熱女真國界東至新羅國



東北不知其極居民屋宇耕養又言語衣裝與熟女真國並同亦無君長所管精於騎射前後屢與契丹爲邊患契丹亦設防備南北二千餘里沿邊創築城堡搬運糧草差撥兵甲屯守征討三十年來深爲患耳南界西南至東京六百里

又東北至屋惹國阿里眉國破骨魯國等國每國各一萬餘戶西南至生女真國界衣裝耕種屋宇言語與女真人異契丹樞密院差契丹或渤海人充逐國節度使管押然不出征賦兵馬每年惟貢進大馬蛤珠青鼠皮貂鼠皮膠魚皮蜜蠟之物及與

北番人任便往來買賣西至上京四千餘里

正東北至鐵離國南至阿里眉等國界居民言語衣裝屋宇耕養稍通阿里眉等國無君長皆雜處山林不屬契丹統押亦不與契丹爭戰復不貢進惟以大馬蛤蛛鷹鵲青鼠貂鼠等皮膠魚皮等物與契丹交易西南至上京五千餘里

次東北至靺鞨國東北與鐵離國爲界無君長統押微有耕種春夏居屋室中秋冬則穿地爲洞深可數丈而居之以避其寒不貢進契丹亦不爭戰惟以鷹鵲鹿細白布青鼠皮銀鼠皮大馬膠魚皮等



與契丹交易西南上京五千里

又次北至鐵離喜失牽國言語衣裝屋舍與靺鞨稍同無君長管押不貢進契丹亦不爭戰惟以羊馬牛駝皮毛之衣與契丹交易西南至上京四千餘里正北至蒙古里國無君長所管亦無耕種以弋獵為業不常其居每四季出行惟逐水草所食惟肉酪而已不與契丹爭戰惟以牛羊駝馬皮毳之物與契丹為交易南至上京四千餘里

又次北至于厥國無君長首領管押凡事竝與蒙古里國同甲寅歲曾率眾入契丹國界為盜聖宗命

駙馬都尉蕭徒欲統兵大破其國邇後更不復為盜惟以牛羊駝馬皮毳之物與契丹為交易東南至上京五千餘里

又次北西至鼈古里國又西北

又次北近西至達打國各無君長每部族多者三二百家少者五七十家以部族內最富豪者為首領不常厥居逐水草以弋獵為業其婦人皆精於騎射常與契丹爭戰前後契丹屢為國人所敗契丹主命親近為西北路兵馬都統率番部兵馬十餘萬防討亦制禦不下自契丹建國已來惟此二國為害無



奈何番兵困乏契丹常為所攻如暫安靜以牛羊  
馳馬皮毳為交易不過半年又却為盜東南至上  
京六千餘里

西近北至生吐蕃國又西北党項突厥等國皆不為  
契丹國害亦不進貢往來蓋以熟土渾突厥党項  
等部族所隔東南至雲州三千里

正西與西一作西夏吳賊黃河為界 西南至麟州府

州界 又次南近西定州北平山為界 又南至霸  
北界河 又次南至遂城北鮑河為界 又南近東  
至滄州北海 又南至安肅軍自澗河為界 又南

近東至登州北海 又南至雄州北拒馬河為界  
又南至海

### 四京本末

上京 太宗建

上京臨潢府乃大部落之地離來州數十里即行  
海岸俯挹滄溟與天同碧窮極目力不知所際有  
訥都烏河番語山為胡都水為烏其東北三十里  
即長泊也涉沙磧過白馬淀渡土河亦云撞撞水  
聚沙成墩少人煙多林木其河邊平處國王會於  
此處過冬又至木葉山三十里許有居人瓦屋及



契丹國志 卷之二十二  
僧舍

中京 承天太后建

中京之地奚國王牙帳所居奚本曰庫莫奚其先東部■宇文之別種也竄居松漠之間俗甚■潔而善射獵好爲寇抄其後種類漸多分爲五部一曰辱紇二曰莫賀弗三曰契个四曰本昆五曰室得每部一千餘人爲其帥隨逐水草中京東過小河唱叫山道北奚王避暑莊有亭臺由古北口至中京北皆奚境奚本與契丹等後爲契丹所併所在分奚契丹漢人渤海雜處之奚有六節度都省

統領言語風俗與契丹不同善耕種步射入山採獵其行如飛 又契丹圖志云奚地居上東燕三京之中土肥人曠西臨馬孟山六十里其山北南一千里東西八百里連亘燕京西山遂以其地建城號曰中京

南京 太宗建

南京本幽州地乃古冀州之域舜以冀州南北廣遠分置幽州以其地在北方幽陰也東有朝鮮遼東北有樓煩白檀西有雲中九原南有滹沱易水唐置范陽節度臨制奚契丹自晉割弃建爲南京



契丹國志 卷之二十二  
又爲燕京併津府戶口三十萬大內壯麗城北有  
市陸海百貨聚于其中僧居佛寺冠于北方錦繡  
組綺精絕天下膏腴蔬菰果實稻粱之類靡不畢  
出而桑柘麻麥羊豕雉兔不問可知水甘土厚人  
多技藝秀者學讀書次者習騎射耐勞苦石晉未  
割弃已前其中番漢雜鬪勝負不相當旣築城後  
遠望數十里間宛然如帶回環繚繞形勢雄傑真  
用武之國也

東京 太宗建

東京本渤海王所都之地在唐時爲黑水靺鞨二

種依附高麗者黑水部與高麗接勝兵數千多驍  
武古肅慎氏地也與靺鞨相鄰東夷中爲強國所  
居多依山水地卑隰築土如堤鑿穴以居其國西  
北與契丹接太祖之興始擊之立其子東丹王鎮  
其地後曰東京

契丹國志卷之二十二終



契丹國志卷之二十三

族姓原始

契丹部族本無姓氏惟各以所居地名呼之婚嫁不拘地里至阿保機變家為國之後始以王族號為橫帳仍以所居之地名曰世里著姓里者上京東二百地名也今有世里沒里以漢語譯之謂之耶律氏復賜后族姓曰蕭氏番法王族惟與后族通婚更不限以尊卑其王族后族二部落之家若不牽北主之命皆不得與諸部族之人通婚或諸部族彼此相婚嫁不拘此限漢人等亦同此故北番惟耶律蕭氏二姓也



國土風俗

契丹國在庫莫奚東唐所謂黑水靺鞨者今其地也  
 有七十二部落不相統制好為寇盜父母死而悲哭  
 者以為不壯但以其屍置於山樹上經三年後乃收  
 其骨而焚之因酌酒而祝曰冬月時向陽食夏月時  
 向陰食我若射獵時使我多得猪鹿其禮頑於  
 諸夷最甚其風俗與奚靺鞨頗同至阿保機稍并服  
 諸小國而多用漢人漢人教之以隸書之半增損之  
 作文字數千以代刻木之約又制婚姻置官號稱皇  
 帝漢時為匈奴所破保鮮卑山魏青龍中部酋為

王雄所殺衆遂微逃潢水之南黃龍之北至元魏自  
 號曰契丹在唐開元天寶間使朝獻者無慮二十故  
 事以范陽節度為押奚契丹使至唐末契丹始盛

併合部落

初契丹有八部族之大者曰大賀氏後分為八部部  
 之長號大人而常推一人為王建旗鼓以統八部每  
 三年則一或無一字以次相代或其部有災疾而畜牧  
 衰則八部聚議以旗鼓立其次而代之被代者以為  
 元約如此不敢爭及阿保機乃曰中國之主無代立  
 者由是阿保機益以威制諸國不肯代其立九年諸



部共責謂之阿保機不得已傳其旗鼓而謂諸部曰  
吾立九年所得漢人多矣吾欲別自爲一部以治漢  
城可乎諸部將許之漢城在炭山東南灤河上有鹽  
鐵之利乃後魏滑鹽縣也其地可植五穀阿機保率  
漢人耕種爲治城郭邑屋廛市如幽州制漢人安之  
不復思歸阿保機知衆可用用其妻述律策使人告  
諸部大人曰我有鹽池之利諸部所食然諸部知食  
鹽之利而不知鹽有主人可乎當來犒我諸部以爲  
然其以牛酒會鹽地阿保機伏兵其旁酒酣伏發盡  
殺諸部大人復併爲一國東北諸夷皆畏服之

### 兵馬制度

晉末契丹主投下兵謂之大帳有皮室兵約三萬人  
騎皆精兵一作甲也爲其瓜牙國母述律氏投下謂之  
屬珊有衆二萬是先戎主阿保機牙將半已老矣每  
南來時量分措得三五千騎述律常留數百兵爲部  
族根本其諸大首領太子偉王永康南北王于越麻  
荅五押等大者千餘騎次者數百人皆私甲也別族  
則有奚霫勝兵亦千餘人少馬多又有渤海首領大  
舍利高漠漢兵步騎萬餘人竝髮左竊爲契丹  
之餘復有近界達靺于厥里室韋女真党項亦被脅



屬每部不過千餘騎其三部落吐渾沙陀洺幽州管內鴈門以北十餘軍州部落漢兵合三萬餘衆此是石晉割賂契丹之地番漢諸族其數可見矣每契丹南侵其衆不啻十萬國主入界之時步騎車帳不從阡陌東西一槩而行大帳前及東西面差大首領三人各率萬騎支散游奕百十里外相交覘邏謂之欄子馬戎主吹角爲號衆卽頓舍環遶穹廬以近及遠折木稍屈之爲弓子鋪不設槍營塹柵之備每軍行聽鼓三伐不問昏晝一布便行未逢大敵不乘戰馬俟近敵師卽競乘之所以新羈戰馬蹄有餘力其用

軍之術成列而不戰俟退而乘之多伏兵斷糧道冒夜舉火上風曳柴饋餉自齋退敗無恥散而復聚寒而益堅此其所長也

建官制度

賤他姓貴耶律蕭氏二姓其官有契丹樞密院及行宮都總官司謂之北面以其在牙帳之北以主蕃事又有漢人樞密院中書省行營都總管司謂之南面以其在牙帳之南以主漢事其惕隱宗正寺也夷離畢參知政事也林牙翰林學士也夷離巾刺史也內外官多做中國者其下佐吏則有做史木古

○舊校云一作



直思奴古都奴古徒奴分領兵馬則有統軍侍衛控  
鶴司南王北王奚王府五帳分提失哥東西都省大  
師兵又有國舅軫轄遙輦党袞諸司南北皮室二十  
部族節度頻必里九克漢人渤海女真五節度五治  
大師一百六九百家奚 凡民年十五以上五十  
以下皆籍為兵將舉兵必殺灰牛白馬祀天地及木  
葉山神鑄金魚符調發兵馬其捉馬及傳命有銀牌  
二百軍所舍有遠探攔子馬以夜聽人馬之聲每其  
至立聚所得一作剽一人戶馬牛金帛及其下所獻生口  
或犯罪沒入者別為行營一作宮領之建州縣置官屬

既死則設大穹廬鑄金為像朔望節辰忌日輒致祭  
築臺高丈餘以盆焚酒食謂之燒飯

### 宮室制度

十宮各有民戶出兵馬阿保機曰洪義宮德光曰永  
興宮元欲曰積慶宮述律曰延昌宮明記曰章敏宮  
突欲曰長寧宮燕燕曰崇德宮隆緒曰興聖宮隆慶  
曰敦睦宮隆運曰文忠王府又有四樓在上京者曰  
西樓木葉山曰南樓龍化州曰東樓唐州曰北樓凡  
一作比受冊積柴升其上大會蕃夷其下已乃燔柴告  
天而漢人不得預有諱子部百人夜以五十人番直



四鼓將盡歌於帳前號曰聒帳每謁拜木葉山卽射柳枝譚子唱番歌前導彈胡琴和之已事而罷

衣服制度

國母與番官皆番服國主與漢官則漢服番官戴瑣冠上以金華爲飾或加珠玉翠毛蓋漢魏時遼人步搖冠之遺象也額後垂金花織成夾帶中貯髮一總服紫窄袍加義襴紫鞞帶以黃紅色縑裏革爲之用金玉水晶碧石綴飾又有紗冠制如烏紗帽無簷不攲雙耳額前綴金花上結紫帶帶末綴珠或紫皂幅巾紫窄袍束帶丈夫或綠巾綠花窄袍中單多紅

綠色貴者被貂裘貂以紫黑色爲貴青色爲次又有銀鼠尤潔白賤者被貂毛羊鼠沙狐裘弓以皮爲弦箭削樺爲斡韉勒輕快便於馳走以貂鼠或鵝項鴨頭爲扞腰宋真宗景德中太常博士王曙戶部員外郎李維往賀國主生辰還言國主見漢使疆服衣冠事已卽幅巾雜蕃騎出射獵矣

漁獵時候

每歲正月上旬出行射獵凡六十日然後竝撻魯河鑿冰釣魚冰泮卽縱鷹鵠以捕鵝鴈夏居炭山或上涇避暑七月上旬復入山射鹿夜半令獵人吹角傲



鹿鳴既集而射之宋真宗時晁迥往賀生辰還言始至長泊泊多野鵝鴨國王射獵領帳下騎擊扁鼓遠泊驚鵝鴨飛起乃縱海東青擊之或親射焉國王皆佩金玉錐號殺鵝殺鴨雖每初獲卽拔毛插之以鼓爲坐遂縱飲最以此爲樂又好以銅及石爲槌以擊兔每秋則衣褐裘呼鹿射之夏月以布易毡帳籍草圍碁雙陸或深澗張鷹

試士科制

太祖龍興朔漠之區倥傯干戈未有科目數世後承平日久始有開闢制限以三歲有鄉府省三試之設

鄉中曰鄉薦府中曰府解省中曰及第時有秀才未願起者州縣必根刷遣之程文分兩科曰詩賦曰經義魁各分焉三歲一試進士貢院以二寸紙書及第者姓名給之號喜帖明日舉接一作樂而出樂作及門擊鼓十二面以法雷震殿試臨期取旨又將第一人特贈一官授奉直大夫翰林應奉文字第二人第三人止授從事郎餘並授從事郎聖宗時止以詞賦法律取士詞賦爲正科法律爲雜科若夫任子之令不論文武並奏廕亦有員數

契丹國志卷之二十三終



契丹國志卷二十四

王沂公行程錄

初奉使者止達幽州後至中京又至上京或西涼淀  
北安州炭山長泊自雄州白溝驛度河四十里至新  
城縣古督亢亭之地又七十里至涿州北度涿水范  
水劉李河六十里至良鄉縣度盧溝河六十里至幽  
州號燕京子城就羅郭西南爲之正南曰啟夏門內  
有元和殿洪政殿東門曰宣和城中坊門皆有樓有  
閔忠寺本唐太宗爲征遼陣亡將士所造又有開泰  
寺魏王耶律漢寧造皆邀朝士遊觀城南門外一作內



有于越王廨爲宴集之所門外永平館舊名碣石館  
請和後易之南卽桑乾河出北門過古長城延芳淀  
四十里至孫侯館改爲望京館稍移故處望楛谷山  
五龍池過温餘河大夏坡坡西北卽涼淀避暑之地  
五十里至順州東北過白嶼河北望銀冶山又有黃  
羅螺盤牛關山七十里至檀州自北一作此漸入山五  
十里至金溝館將至館川原平廣謂之金溝淀國主  
嘗於此過冬自此入山詰曲登涉無復里堠但以馬  
行記日景而約其里數過朝鯉河亦名七度河九十  
里至古北口兩旁峻崖中有路僅容車軌口北有鋪

穀弓連繩本范陽防扼奚契丹之所最爲隘京然幽

州東趨營平州

一本此下有路字

甚平垣自頃犯邊多由斯

出又度德勝嶺盤道數層俗名思鄉嶺八十里至新

館過雕窠嶺偏

一作偏槍一作槍

嶺四十里至卧如來館

盖山中有卧佛像故也過烏灤河東有灤州因河爲

名又過墨斗嶺一名渡雲嶺長二十里許又過芹菜

嶺七十里至柳河館河在館旁西北有鐵冶多渤海

人所居就河漉沙石鍊得成鐵渤海俗每歲時聚會

作樂先命善歌善舞者數輩前行士女相隨更相唱

和回旋宛轉號曰踏鎚

一作追

所居室皆就山墻開門



過松亭嶺甚險峻七十里至打造部落館惟有番戶百餘編荆爲籬鍛鐵爲軍器東南行五十里至牛山館八十里至鹿兒峽館過蝦蟆嶺九十里至鐵漿館過石子嶺自此漸出山七十里至當一作富谷館居民多造車者云渤海人正東望馬雲山山多禽獸林木國主多於此打圍八十里至通天館二十里至中京大定府城垣庫小方圓纔四里許門但重屋無築閣之制南門曰朱夏門內夾道步廊多坊門又有市樓四曰天方大衢通闕望闕次至大同館其北門曰陽德闔闔城內西南隅岡上有寺城南有圍圍宴射之

所自過古北口卽蕃境居人草庵板屋亦務耕種但無桑柘所種皆從隴上蓋虞吹沙所壅山中長松鬱然深谷中多燒炭爲業時見畜牧牛馬橐馳尤多青羊黃豕亦有挈車帳逐水草射獵食止糜粥炒糲

富鄭公行程錄

富鄭公之使北朝也自中京正北八十里至臨都館又四十里至官窰館又七十里至松山館又七十里至崇信館又九十里至廣寧館又五十里至姚家寨館又五十里至咸寧館又三十里度潢水石橋旁有饒州蓋唐朝嘗於契丹置饒樂州也今渤海人居之



又五十里至保和館度黑河七十里至宣化館又五  
 十里長泰館西二十里許有佛寺民社又云即祖  
 州亦有祖山山中有阿保機廟又四十里至上京臨  
 潢府自過崇信館即契丹舊境蓋其南皆奚地也又  
 西門門曰金德內有臨潢館子城東門曰順陽入門  
 北行至景福門又至承天門內有昭德宣政二殿皆  
 東向其壇廬亦皆東向臨潢西北二百餘里號涼淀  
 在漫頭山南避暑之處多豐草掘丈餘即堅冰云

余尙書北語詩

余靖尙書使契丹為北語詩契丹愛之再往益親余

詩云夜筵設罷多盛也臣拜洗受賜也兩朝厥荷通好情也

幹勒厚重也微臣稚魯拜舞也祝若統福佑也聖壽鐵擺嵩高也

俱可忒無極也國主舉大杯謂余曰能道此余為卿

飲復舉之國主大笑遂為醕觴

刁奉使北語詩

刁約使契丹為北語詩云押燕移離畢移離畢官名如中國執政

看房賀跋支賀跋支如執政防閣餞行三匹裂匹裂似小木器以木色綾木為

之加密賜十貔狸形如鼠而大穴居食穀梁嘗肉黃漆北朝為珍膳味如豚肉而脆

契丹國志卷之二十四終



契丹國志卷之二十五

胡嶠陷北記

同州郃陽縣令胡嶠居契丹七年周廣順三年亡歸  
中國略能道其所見云自幽州西北入居庸關明日  
又西北入石門關路崖狹一本作隘一夫可以當百此  
中國控扼契丹之險也又三日至可汗州南望五臺  
山其一峯最高者東臺也又三日至新武州西北行  
五十里有雞鳴山云唐太宗北伐聞雞鳴于此因以  
名山明日入永定關此唐故關也又四日至歸化州  
又三日登天嶺嶺東西連亘有路北下四顧冥然黃



雲白草不可窮極契丹謂嶠曰此辭鄉嶺也可一南望而為永訣同行者皆慟哭往往絕而復蘇又行三四日日一作百里二字至黑榆林時七月寒如深冬又明日入斜谷谷長五十里高岸又作崖峻谷仰不見日而寒尤甚已出谷得平地氣稍溫又行二日渡湟水又明日渡黑水又二日至湯城淀地氣最溫契丹苦太寒則就溫於此其水泉清冷草軟如茸可籍以寢而多異花記其二種一日旱一作早金大如掌金色爍人一日青囊如中國金燈而色類藍可愛又二日至儀坤州渡麝香河自幽州至此無里候其所向不知為南

北又二日至赤崖蕭翰與世宗兀欲相及遂及述律太祖后之后戰於沙河述律兵敗而北兀欲追至獨樹渡遂因迷律于撲馬山又行三日遂至上京所謂西樓也西樓有邑屋市肆交易無錢而用布有綾錦諸工作官者翰林伎術教坊角觝秀才僧尼道士等皆中國人而并汾幽薊之人尤多自上京東去四十里至真珠寨始食菜明日東行地勢漸高西望平地松林鬱然數十里遂入平川多草木始食西瓜云契丹破回紇得此種以牛糞覆棚而種大如中國冬瓜而味甘又東行至裏潭始有柳而水草豐美有息雞草尤



美而本大馬食不過十本而飽自裹潭入山行十餘日而出過一大林長二三里皆蕪荑枝葉有芒刺如箭羽其地皆無草兀欲時卓帳于此會諸部人堊太宗自此西南行日六十里行七日至大山門兩高山相去一里而長松豐草珍禽異獸野卉有屋室碑石曰陵所也兀欲入祭諸部大人惟執祭器者得入入而門闔明日開門曰拋蓋禮畢問其禮皆祕不肯言嶠所目見囚迷律堊太宗等事與中國所記差異已而翰得罪被鎖嶠與部曲東之福州福州翰所治也嶠等東行過一山名十三山云此西南去幽州二千

里又東行數日過衛州有居人三千餘家蓋契丹所據中國衛州人築城而居之嶠至福州而契丹多憐嶠教其逃歸嶠因得其諸國種類遠近云距契丹國東至于海有鐵甸其族野居皮帳而人剛勇其地少草木水鹹濁色如血澄之久而後可飲又東女真善射多牛鹿野狗其人無定居行以牛負物遇雨則張革一作韋為屋常作鹿鳴呼鹿而射之食其生肉能釀糜為酒醉則縛之而睡醒而後解不然則殺人又東南一本無南字渤海又東遼國皆與契丹畧同其南海曲有魚鹽之利又南奚與契丹畧同而人好殺戮又南



至于榆關矣西南至儒州皆故漢地西則突厥回紇西北至嫺厥律其人長大髦頭酋長全其憂盛以紫囊地苦寒水出大魚契丹仰食又多黑白黃貂鼠皮北方諸國皆仰足其人最勇鄰國不敢侵又其西轄曼又其北單于突厥皆與嫺厥律畧同又北黑車子善作車帳其人知孝義地貧無所產云契丹之先常役回紇後背之走黑車子始學作車帳又北牛蹄突厥人身牛足其地尤寒水曰瓠瓠河夏秋水厚二一作三尺春冬冰徹底常燒器銷冰乃得飲東北至韃靼子其人髦首披布爲衣不鞍而騎大弓長箭尤善射

遇人輒殺而生食其肉契丹等國皆畏之契丹五騎遇一韃靼子則皆散走其國三面皆室韋一曰室韋二曰黃頭室韋三曰獸室韋其地多銅鐵金銀其人工巧銅鐵諸器皆精好善織毛錦地尤寒馬溺至地成冰堆又北狗國人身狗首長毛不衣手搏猛獸語爲犬嗥其妻皆人能漢語生男爲狗女爲人自相婚嫁穴居食生而妻女人食云嘗有中國人至其國其妻怜之使逃歸與其筋十餘隻教其每走十餘里遺一筋狗夫追之見其家物必啣而歸則不能追矣其說如此又曰契丹常選百里馬二十匹遣十人齎乾



契丹國志 卷之二十五  
鈔北行窮其所見其人自黑車子麻牛蹄國以北行  
一年經四十三城居人多以木皮為屋其語言無譯  
者不知其國地山川部族名號其地氣遇平地則溫  
和山林則寒冽至三十三城得一人能鐵甸語其言  
頗可解云地名頡利烏于作干邪堰云自此以北龍  
蛇猛獸魑魅羣行不可往矣其人乃還此北荒之極  
矣契丹謂嶠曰契丹之人豈能勝中國然晉所以敗  
者主暗而臣不忠因具道諸國事曰子歸悉以語漢  
人使漢人努力事其主無為所擄吾國非入境也嶠  
歸錄以為記云

張舜民使北記

殺狐林

契丹主太宗怒晉出帝不稟北命擅登大寶自將兵  
南下執出帝并母后大臣北歸於鄴西愁死崗得疾  
至鬻一作樂城殺狐林而崩崗一本崗上者本陳思  
王不為文帝所容於此悲吟一作思號愁思崗訛為愁  
死殺狐林者村民林中射殺一狐因以名之

堯元國

契丹上京曾有人忽見二青衣駕赤犢出耳中別有  
天地花木繁茂云堯元國也



割馬肝

張舜民使契丹是時耶律永興姚跋洄二人接伴舜民因問北馬有割去肝者遂無病能行果否荅云有之其法飲以醇酒於腋間破之取去少肉然亦十喪八九

雕窠生獵犬

舜民又問北地雕窠中生獵犬果否荅云亦有之然極難得今駕前有二隻其性頗異每臘而獲十倍於常犬

吹葉成曲

胡人吹葉成曲以番歌相和音韻甚和

銀牌

銀牌形如方響刻蕃書宜速二字使者執牌馳馬日行數百里牌所至如國主親到需索更易無敢違者

佛粧

北婦以黃物塗面如金謂之佛粧

以車渡河

過盧溝河伴使云恐乘橋危莫若車渡極安且可速濟南人不曉其法



契丹國志卷之二十六

諸蕃記

奚國

太祖初興擊奚滅之復立奚王而使契丹監其軍後為中京詳見前志

古肅慎國

古肅慎城方作。一五里在渤海國都三十里遺堞尚在

室韋國

字作。一或為失蓋契丹之類其南者為契丹在此者



號為室韋路出和龍北千餘里入契丹國與奚契丹同夏則城居冬逐水草有南室韋北室韋其俗丈夫皆披髮婦人皆盤髮衣服與契丹同乘牛車以蘆蔭為屋如瓊車狀度水則束薪為檣或有以皮為舟者馬則織草為韉結繩為轡氣候多寒田收甚薄惟射獵麋鹿為務食肉衣皮鑿冰溪水中而網取魚鱉地多積雪懼陷阬窞一作窄騎木而行太祖併諸番三十六國室韋在其中

新羅國

新羅在高麗東國本漢時樂浪地其言語名物有似

中國人名國為邦宮為弧賊為寇行酒為行觴相呼皆為徒文字甲兵同於中國選人壯健者悉入軍每月旦相賀王設宴會班賚羣官有大事則聚官詳議定之田甚良沃水陸兼種服色尚素婦人辮髮繞頭以雜絲及珠為飾婚嫁唯酒食而已輕重隨貧富新羅國王誦自契丹承天皇后初臨朝入貢其後王誦為部下所殺立其弟詢契丹以王詢不進貢與兵北討十年方罷兵新羅依舊朝貢

高昌國

高昌都交河城漢車師前王庭也四面多大山晉以



其地爲高昌郡地石磧氣候溫暖厥土良沃麥一歲再熟宜蠶有草名羊刺其上生蜜而味甚佳引水溉田出赤鹽其味甚美俗事天神兼信佛法其官有八長史有五將軍又有侍郎校郎主簿從事階位相次契丹時三作一年一次朝貢進獻玉珠乳香斜合里皮褐里絲等亦有互市其國王親與北王評價

女真國

女真世居混同江之東山乃鴨綠水之源東瀕海南鄰高麗西接渤海北近室韋其地乃肅慎故區也地方數千里戶口十餘萬無大君長立首領分主部落

地饒山林田宜麻穀土產人參蜜蠟北珠生金細布松實白附子禽有鷹鷂海東青之類獸多牛馬麋鹿野狗白鼯青鼠貂鼠後爲契丹所制擇其酋長世襲又於長春路置東北統軍司黃龍府置兵馬都部署司咸州置詳穩司分隸之後屬於契丹其後常遣銀牌天使至女真每夕必欲薦者其國舊輪中下戶作止宿處以出適待之後求海東青使者絡繹侍大國使命惟擇人不問其有及闕閭高者女真浸忿遂

黃頭女真



契丹國志 卷之二十六 三  
黃頭女真皆山居號合蘇館女真合蘇館河西亦有之有八館在黃河東與金粟城五花城隔河相近其人慙朴勇鷙不能別死生契丹每出戰皆被以重札令前驅髭髮皆黃目睛多綠亦黃而白多

嗚熱者國

嗚熱者國最小不知其始所居後爲太祖徙置黃龍府南百餘里曰賓州州近混同江卽古之粟末河黑水也部落雜處以其族類之長爲千戶統之契丹貴游子弟及富家兒月夕被酒則相率攜樽馳馬戲飲其地婦女聞其至多聚觀之間令侍坐與之酒則飲

亦有起舞歌謳以侑觴者邂逅相契調謔往反卽載以歸婦之父母知亦不爲之顧留數歲有子始具茶食酒數車歸寧謂之拜門因執子婿之禮其俗謂男女自媒勝於納幣而婚者飲食皆以木器好寘蠱他人欲其不驗者云三彈指於器上則其毒自解亦間有遇毒而斃者族多姓李

渤海國

渤海國去燕京東北千五百里以石累城脚東並海其王舊以大爲姓右姓曰高張楊竇烏李不過數種部曲奴婢無姓者皆從其主婦人皆悍妬大氏與他



姓相結十姊妹送幾察其夫不容側室及他游聞則必謀寘毒死其所愛一夫有所犯而妻不之覺者衆人則羣聚而詬之爭以忌嫉相誇男子多智謀驍勇出他國右至有三人渤海當一虎之語自天祚之亂金人陷城慮其難制轉徙他所其人大怨富室安居踰二百年往往爲園池植牡丹多至三二百本有數十幹作餘叢生者皆燕地所無纔以十數千或五千作賣賤貨作賣而去其居故地者仍歸契丹舊爲東京置留守有蘇扶復等州蘇與宋作萊登州青州相直每大風順隱隱聞雞犬聲

終

契丹國志卷之二十七

歲時雜記

正旦

正月一日國主以糯米飯白羊髓相和爲團如拳大於逐帳內各散四十九箇候五更三點國主等各於本帳內牕中擲米團在帳外如得雙數當夜動蕃樂飲宴如得隻數更不作樂便令師巫十二人外邊遶帳撼鈴執箭唱叶於帳內諸火爐內爆鹽并燒地拍鼠謂之驚鬼本帳人第七日方出乃穰度之法北呼此謂之妳捏離漢人譯云妳是丁捏離是日



立春

立春日婦人進春書以青繪為幟刻龍象啣之或為蝦蟆

人日

人日京都人食煎餅於庭中俗云董天未知所從出也

中和

二月一日大族姓蕭者並請耶律姓者於本家筵席北呼此節為轄里討漢人譯云轄里是請回是時上巳

三月三日國人以木雕為兔分兩朋走馬射之先中者勝其負朋下馬跪奉勝朋人酒勝朋於馬上接杯飲之北呼此節為淘裏化漢人譯云淘裏是兔化是射

佛筵日

四月八日京府及諸州各用木雕悉達太子一尊城上昇行放僧尼道士庶民行城一日為樂

端午

五月五日午時採艾葉與綿相和絮衣七事國王著之蕃漢臣僚各賜艾衣三事國王及臣僚飲宴渤海



契丹國志 卷之二十一  
厨子進艾糕各點大黃湯下北呼此節為耐賽離又以雜絲結合歡索纏于臂膊婦人進長命縷宛轉皆為人象帶之

朝節

夏至日婦人進扇及粉脂囊

二伏

六月十八日大族耶律姓並請蕭姓者亦名轄里尉

中元

七月十三日夜國主離行宮向西三十里卓帳宿先於彼處造酒食至十四日應隨從諸軍並隨部落動

番樂設宴至暮國主却歸行宮謂之迎節十五日動漢樂大宴十六日早却往西方令隨行軍伍大噉三聲謂之送節此節為賽離捨漢人譯云賽離是月捨是好謂月好也

中秋

八月八日國主殺白犬於寢帳前七步埋其頭露其嘴後七日移寢帳於埋狗頭上北呼此節為担褐妳漢人譯云担褐是狗妳是頭

重九

九月九日國主打團斗射虎少者輸重九一筵席射



罷於地高處卓帳與番漢臣登高飲菊花酒出兔肝  
切生以鹿舌醬拌食之北呼此節為必里遲離漢人  
譯云九月九日也又以菜蕒研酒灑門戶間辟惡亦  
有入鹽少許而飲之者又云男摘二九粒女一九粒  
以酒咽者大能辟惡

小春

十月內五京進紙造小衣甲并槍刀器械各一萬副  
十五日一時堆垛國王與押番臣寮望木葉山墓太祖處  
奠酒再作拜一用番字書狀一紙同焚燒奏木葉山神  
云寄庫北呼此時為戴粹漢人譯云戴是燒粹是甲

冬至

冬至日國人殺白羊白馬白鴈各取其生血和酒國  
王北望拜黑山奠祭山神言契丹死魂為黑山神所  
管又彼人傳云凡死人悉屬此山神所管富民亦然  
契丹黑山如中國之岱宗云凡人死魂皆歸此山每  
歲五京進人馬紙物各萬餘事祭山而焚之其禮甚  
嚴非祭不敢近山一本無契丹死魂為黑山神所管又彼人十三字

臘月

臘月國王帶甲戎裝應番漢臣諸司使已上並戎裝  
五更三點坐朝動樂飲酒罷各等第賜御甲羊馬北



契丹國志 卷之二十一  
呼此節為抄一作離時戰時也  
抄下同離時漢人譯云抄離是戰時是

治盜

正月十三日放國人做賊三日如盜及十貫以上依法行遣北呼為鶻里時漢人譯云鶻里是偷時是時

行軍

契丹行軍不擇日用艾和馬糞於白羊琵琶骨止炙炙破便出行不破即不出

午日

契丹出軍每遇午日起程如不用兵亦須排辦望西

一本西大嗽七聲音午是北朝大王之日  
下有南字

旋風

契丹人見旋風合眼用鞭望空打四十九下口道坤不刺七聲

舍利

契丹富豪民要裏頭巾者納牛駝十頭馬百匹給契丹名目謂之舍利

跪拜

男女拜皆同其一足跪一足着地以手動為節數止於三彼言捏骨地者即跪也



長白山

長白山在冷山東南千餘里蓋白衣觀音所居其山禽獸皆白人不敢入恐穢其間以致蛇虺之害黑水發源於此舊云粟末河大宗破晉改為混同江其俗剝木為舟長可八尺形如梭曰梭船上施一槳止以捕魚至渡車則方舟或三舟

澤浦

西樓有蒲瀕水叢生一幹葉如柳長不盈尋丈用以作箭不矯揉而堅左氏所謂董澤之蒲是也

回鶻豆

回鶻豆高二尺許直幹有葉無旁枝角長二寸每角止兩豆一根才六七角色黃味如粟。一作栗

螃蜞

渤海螃蜞紅色大如椀螯巨而厚其跪如中國蟹螯石舉鮐魚之屬皆有之

契丹國志卷之二十七終



契丹國志

卷之二十一

六



